

दिनांक : 17.03.2026

समय : 18.45 बजे

- मुख्यमंत्री भजनलाल शर्मा जयपुर मांय राखी ज्या राजस्थान युवा शक्ति दिवस कार्यक्रम मांय विकास री 485 करोड़ रुपया रा खर्च वाळी परियोजनावां री नींव रखी अर पूरा व्ह्या काम जनता ने संप्यां
- केन्द्र सरकार राज्य सरकारां ने कागद लिख र पीएनजी पाइपलाइन परियोजनावां बेगी पूरी करण बाबत् कह्यो
- राज्यपाल हरिभाऊ बागडे देश ने खुद रे पाण ऊबो करण रा काम मांय विश्वविद्यालयां रा योगदान ने खास बतायो
- प्रदेश मांय काल केई हलकां मांय आंधी चालण सागे हल्की बिरखा रा आसार-कठे-कठे ओला पड़बा री संभावनां

000

मुख्यमंत्री भजनलाल शर्मा कह्यो है के राज्य सरकार नौजवानां रो पूरो विकास करण अर वां ने नौकरी-धंधा रा नुवा मौका मुहैया करावणो तैय कीनो हैं वे आज जयपुर मांय राजस्थान दिवस समारोह रा सिलसिला मांय राखी ज्या 'राजस्थान युवा शक्ति दिवस' कार्यक्रम मांय बोल रह्या हां श्री शर्मा कह्यो के राज्य सरकार आवता 5 साल मांय 4 लाख सरकारी अर 6 लाख गैर-सरकारी नौकरियां मुहैया करावणो तैय कीनो है अर हाल तांई सवा लाख ऊं बत्ती नौकरियां दी जा चुकी हैं मुख्यमंत्री कह्यो के राजस्थान चैत महीना री उजाळी एकम् ने बण्योडो हो, ई कारण ई साल 19 मार्च ने पूरा हरख-उमाव सागे राजस्थान दिवस मणायो जावेलो वे कह्यो के पाणी-बिजली री पूर्ति सारू ईआरसीपी अर दूजी मोटी योजनावां माथे तेजी ऊं काम चाल रह्यो हैं वे नौजवानां ऊं खुद रा काम-धंधा अर कारोबार रा हलका मांय आगे आवण री अरज कीनीं मुख्यमंत्री कह्यो के नौजवानां ने नौकरी लेवण वाळा री बजाए नौकरी देवण वाळा बणणा चाहिजे

.....

ई मौके मुख्यमंत्री भणार्ई-लिखाई, कौशल विकास अर खेल-कूद ऊं जुडी 485 करोड़ रुपया रा खर्च वाळी न्यारी-न्यारी परियोजनावां री सरूआत कीनी अर पूरा व्ह्या काम जनता ने संप्यां राजस्थान दिवस रा सिलसिला मांय आज केई जिलां मांय कार्यक्रम राखी ज्यां

000

वाणिज्य अर उद्योग मंत्री पीयूष गोयल कह्यो है के आतूणी एशिया मांय चाल रही तणा-तणी रे बावजूद, भारत री माली व्यवस्था मजबूत बण्योडी हैं आज लोकसभा मांय प्रश्नकाल रे दौरान पूरक सवालां रा जवाब मांय गोयल कह्यो के भारत सागे कारोबारी रिश्ता मजबूत बणावण सारू आखी दुनिया मांय उमाव बध रह्यो हैं

.....

वाणिज्य अर उद्योग मंत्री कह्यो के मुक्त व्यापार समझौता लागू व्ह्या पाछे दिसावर मांय माल बेचण सारू खूब मौका बणेलो

000

पेट्रोलियम अर प्राकृतिक गैस मंत्रालय री संयुक्त सचिव सुजाता शर्मा कह्यो है के देश मांय पेट्रोल अर डीजल ज़रूरी तादाद मांय मौजूद हैं वे आज नई दिल्ली मांय खबरनवीसां ने बतायो के सरकार होटल-ढाबां अर कारोबार मांय रसोई गैस री टंकियां काम लेवण वाळां कानी ऊं अब पाइप ऊं मिलण वाळी प्राकृतिक गैस-पीएनजी काम लेवण ने बधावो दे रही हैं श्रीमती शर्मा कह्यो के केन्द्र सरकार सगळी राज्य सरकारां अर केन्द्र रा राज वाळा प्रदेशां ने कागद लिख र पाइपलाइन बिछावण रा काम ने तुरत मंजूरी देवण सारू कह्यो हैं ई सागे ई नुवी अर्जी देवण वाळां ने 24 घंटा मांय मंजूरी देवण सारू ई कही ज्यो हैं

000

कतर ऊं करीब 46 हजार मीट्रिक टन रसोई गैस ले र रवाना व्ह्यो भारत रो जहाज नंदा देवी गुजरात रा वडीनार बंदरगाह माथे पूग ग्यो हैं ओ जहाज होर्मुज जल-डमरू-मध्य ऊं व्हेतो थको भारत पूर्यो रसोई गैस ले र एक और जहाज काल मुंद्रा बंदरगाह पूर्यो हों अहलकारां रे मुजब देश मांय फिलहाल रसोई गैस

री कोई कमी नी हैं दीनदयाल बंदरगाह प्राधिकरण रा अध्यक्ष सुशील कुमार सिंह आज वडीनार मांय एक मोटा जहाज ऊं रसोई गैस दूजा जहाज मांय भरण री जाणकारी दीनीं वे बतायो के 'नंदा देवी' जहाज ऊं रसोई गैस छोटा जहाजां मांय भर र एनोर अर हल्दिया भेजी जावेलां

000

सरकार साफगोई, जवाबदेही अर किसानां रा दावा रा टेमसर निपटारा तैय करण सारु प्रधानमंत्री फसल बीमा योजना मांय बदलाव कीनो हैं कृषि अर किसान कल्याण मंत्री, शिवराज सिंह चौहान आज लोकसभा मांय पूरक सवालं रा जवाब देता थकां आ जाणकारी दीनीं वे कहयो के नुवा प्रावधानां ने मुजब बीमा कंपनियां कानी ऊं 21 दिन री मियाद मांय किसानां रा दावा रा निपटारा नी करण री सूरत मांय कम्पनियां कानी ऊं किसानां ने 12 फीसदी री रेट ऊं ब्याज देवणो व्हेलां श्री चौहान कहयो के राज्य सरकारां कानी ऊं दावा प्रक्रिया मांय मोडो करण री सूरत मांय वां ने ई 12 फीसदी ब्याज देवणो व्हेलां कृषि मंत्री कहयो के किसान, दावा निपटारा ऊं जुड़ी शिकायतां कृषि रक्षक पोर्टल माथे दर्ज करा सके हैं

000

राज्यपाल हरिभाऊ बागडे कहयो है के देश ने खुद रे पाण ऊबो करण रा काम मांय विश्वविद्यालयां रो योगदान जरूरी हैं वे आज उदयपुर मांय एसोसिएशन ऑफ इंडियन यूनिवर्सिटीज री 'वेस्ट ज़ोन वाइस चांसलर मीट' मांय बोल रहया हां श्री बागडे कहयो के नुवी शिक्षा नीति रे ज़रिए ज्ञान री जूनी परंपरा ने ओजू काम लेवण री कोशिश करी जा रही हैं राज्यपाल शोध अर नवाचार माथे ज़ोर दीनो

000

अजमेर रेल मंडल मांय हाल तांई सूरज री रोशनी ऊं बिजली बणावण री 4 हजार 476 किलोवाट बूता री मशीनां लगा दीरीजी हैं मंडल रेल प्रबंधक राजू भूतड़ा आ जाणकारी दीनीं वे बतायो के सूरज री रोशनी ऊं बणी बिजली काम लेवण ऊं मंडल ने लारला माली साल मांय करीब 80 लाख रुपया री बचत व्ही डी.आर.एम बतायो के मंडल मांय सूरज री रोशनी ऊं अढाई मेगावाट बिजली बणावण रा बूता वाळी और मशीनां लगायी जा रही हैं

000

एसओजी वरिष्ठ अध्यापक भर्ती परीक्षा-2022 मांय धोखाधड़ी रा मामला मांय एक चुणी ज्या उम्मीदवार अर एक फर्जी उम्मीदवार ने गिरफ्तार कीना हैं पुलिस रा अतिरिक्त महानिदेशक विशाल बंसल बतायो के उम्मीदवार डमी परीक्षार्थी रे मार्फत परीक्षा पास कर र विज्ञान रा शिक्षक ओहदा माथे चुणी ज्यो हों वो लारला दो साल ऊं फरार हो अर वां माथे पांच हजार रुपया रा ईनाम रो ऐलाण करी ज्यो हो, जद के डमी उम्मीदवार माथे दस हजार रुपया रो ईनाम हों

000

प्रदेश मांय काल जोधपुर अर बीकानेर संभाग अर शेखावाटी हलका मांय कठे-कठे बादळां री गाज अर आंधी चालण सागे हल्की बिरखा रा आसार हैं मौसम केंद्र जयपुर रा निदेशक राधेश्याम शर्मा बतायो के 19 अर 20 मार्च ने कठे-कठे ओला पड़बा री शंका हैं

.....

महकमा रे मुजब 21 मार्च ऊं मौसम साफ़ रेहवण री संभावना हैं ई बीचे, लारला चौबीस घंटा मांय दिन अर रात री बगत पारो उतर्यो राज्य रा आतूणी हलका मांय लारला दिनां पारो 40 डिग्री सेल्सियस ने पार कर ग्यो हो, जो अब 34 ऊं 38 डिग्री सेल्सियस बीचे चाल रह्यो हैं

000

पाली मांय कर्मचारी राज्य बीमा निगम रा सगळा काम अब ऑनलाइन अर बिना कागज कर्या जा रहया हैं ई रे तैत बीमारी, जापा अर काम रे दौरान मौत व्हे जावण या हादसो व्हे जावण रा हालात मांय माली अर ईलाज री मदद दी जावे हैं ई सागे ई दावां रा निपटारा अर चुकारा ई ऑनलाइन तरीका ऊं कर्या जा रहया हैं

000

प्रधानमंत्री नरेन्द्र मोदी आकाशवाणी ऊं हर महीना प्रसारित कर्या जावण वाळा खास कार्यक्रम "मन की बात" मांय 29 मार्च-दीतवार ने विचार बतावेलां आ ई कार्यक्रम री 132वीं कड़ी व्हेलां ई सारु आप ई मुफ्त नम्बर 1800-11-7800 माथे 27 मार्च तांई राय दे सको हों विचार नरेन्द्र मोदी एप अर माय जीओवी ओपन फोरम रे ज़रिए ई भेजा जा सके हैं

000